

SAMÞYKKT

um sorphreinsun á Selfossi.

1. gr.

Selfossbær annast eða býður út alla sorphreinsun innan bæjarmarka Selfossbæjar, samkvæmt ákvæðum þessarar samþykktar og fer sorphreinsunin fram undir yfirstjórn bæjarins og eftirliti heilbrigðisfulltrúa.

I. KAFLI

Hreinsun á sorpi frá íbúðarhúsnæði.

2. gr.

Sérhver eigandi íbúðar á Selfossi er skyldur til þess að sjá svo um að við húseign hans sé soppgeymsla gerð fyrir sorppoka.

Sorppoka skal koma fyrir í grind eða skáp, enda uppfylli nefndur búnaður ákvæði byggingar og heilbrigðisreglugerðar. Soppgeymslurnar skulu vera aðgengilegar fyrir sorphirðumenn og húseigendur skulu hreinsa snjó frá soppgeymslum á vetrum og halda greiðfærri leið að þeim svo auðvelt sé að framkvæma hreinsun. Húseigendur skulu kosta kaup soppgeymsluíláta sinna, uppsetningu þeirra og viðhald.

3. gr.

Sorphirðumenn annast hreinsun á öllu sorpi sem er í pokum, einnig tilfallandi eðlilegum úrgangi, svo sem umbúðum af heimilistækjum og hlutum sem rúmast illa í pokum, enda séu hlutir þessir auðveldir í meðförum fyrir einn mann.

4. gr.

Í sorppoka má setja algengt húsasorp, svo sem matarleifar, umbúðir, ónýtan fatnað, blöð og pappír og affall af lóðum annað en mold, torf og grjót. Glerbrotum og öðrum oddhvössum hlutum sem hætta er á að skeri eða rífi pokana, skal pakkað inn eða gengið frá þeim á annan tryggilegan hátt. Pokar mega ekki vera þyngri en svo að auðvelt sé að meðhöndla þá og ekki sé hætta á að þeir rifni. Gæta skal þess að fylla sorppoka ekki meira en svo að auðveldlega megi loka þeim. Sorphirðumönnum er heimilt að skilja eftir poka sem fylltir eru um of, rifnir eða svo þungir að hætta sé á að þeir rifni. Hverju húsi skal fylgja a. m. k. einn poki fyrir hverja íbúð. Í fjölbýlishúsum með sérstakar soppgeymslur sé frágangur allur með samþykki heilbrigðisfulltrúa og heilbrigðisnefndar og uppfylli ákvæði byggingarreglugerðar. Yfirfyllta poka verður húseigandi eða umráðamaður húsnæðis að flytja á eigin kostnað á sorphaugana.

5. gr.

Sorphreinsun fer að jafnaði fram einu sinni í viku. Um stórhátíðar skal framkvæma aukahreinsun, eftir því sem við verður komið og þörf kann að vera á. Selfossbær leggur til einn sorppoka fyrir hverja viku ársins, eða jafnmarga og húseigandi kann að nota að öllu jöfnu, enda greiði notandi sorphreinsigjald fyrir sama fjölda sbr. 8. gr. Aukapoka má fá keypta í verslunum eða í áhaldahúsi bæjarins.

6. gr.

Allt það sorp sem eigi verður látið í poka eða sem hirða þarf örar en samþykkt þessi gerir ráð fyrir, skulu hlutadeigendur annast sjálfir, á eigin kostnað, sé ekki um annað samið.

II. KAFLI

Hreinsun á sorpi frá verslunar- og iðnfyrirtækjum.

7. gr.

Verslunar- og iðnaðarfyrirtækjum og þeim aðilum öðrum sem hafa með höndum starfsemi sem krefst tíðari og viðameiri sorphreinsunar en um getur í 2., 3. og 4. gr. þessarar samþykktar, ber sjálfum að annast og kosta þá sorphirðu. Allur flutningur á vegum einstaklinga og fyrirtækja á sorphauga Sorpstöðvar Suðurlands á Selfossi skal framkvæmdur eftir ströngustu fyrirmælum starfsmanna sorpstöðvarinnar og þrífnaður hafður í hávegum. Þau fyrirtæki sem hafa gáma í stað poka, skulu haga gerð og útbúnaði gámanna í samráði við sorphreinsunaraðila sbr. 1. gr. í hverju tilviki fyrir sig. Gámar þeir sem notaðir verða metast sem ákveðin mörg pokagildi, og greiðir viðkomandi fyrir þann fjölda sbr. 8. gr.

III. KAFLI

Sorphreinsigjald, kvartanir og brot gegn samþykkt þessari.

8. gr.

Almenn sorphirða venjulegs húsasorps sbr. 5. gr. þessarar samþykktar greiðist af bæjarsjóði, þó skal bæjarstjórn heimilt að leggja á sorphreinsigjald eftir nánari ákvörðun hverju sinni, er miðist við fjölda þeirra sorpgrinda/skápa er húseigandi notar. Sorphreinsigjald sem bæjarstjórn ákveður í sérstakri gjaldskrá sem heilbrigðismálaráðherra staðfestir skal lagt á með fasteignagjöldum og innheimt með þeim. Sorphreinsigjald verði aldrei hærra en sannanlegur kostnaður við sorphirðu.

9. gr.

Hafi húseigandi fram að færa kvörtun vegna sorphirðunnar skal hann koma slíkri kvörtun til tæknideildar Selfossbæjar.

10. gr.

Brjótí húseigandi ákvæði samþykktar þessarar um meðferð og geymslu sorps skulu sorphirðumenn tilkynna það tæknideild Selfossbæjar sem gangast skal í því að húseigandi bæti ráð sitt. Bæti húseigandi ekki úr innan ákveðins tíma eru sorphirðumenn ekki skyldugir til að taka sorp hjá viðkomandi fyrr en úr hefur verið bætt. Sé um brot á lögum um hollustuhætti og heilbrigðiseftirlit að ræða skal tæknideild Selfossbæjar tilkynna það heilbrigðisnefnd sem geri viðeigandi ráðstafanir til þess að húseigandi bæti úr. Sorphreinsunarmönnum er óheimilt að hnýsast í sorppoka eða hirða úr þeim muni.

11. gr.

Með brot á samþykkt þessari skal farið samkvæmt lögum nr. 50/1981 um hollustuhætti og heilbrigðiseftirlit.

IV. KAFLI

Gildistaka.

12. gr.

Ofangreind samþykkt bæjarstjórnar Selfoss staðfestist hér með skv. 22. gr. laga nr. 50/1981, um hollustuhætti og heilbrigðiseftirlit til þess að öðlast þegar gildi við birtingu. Jafnframt fellur úr gildi samþykkt um sorpheimtu á Selfossi frá 2. maí 1980.

Ákvæði til bráðabirgða.

Meðferð sorps í tunnum eins og nú er viðhöfð á Selfossi í dag skal með samþykkt þessari um sorphreinsun á Selfossi, felld niður og upp tekin í staðinn meðferð sorps í pokakerfi, eins og samþykkt þessi mælir fyrir um. Þó skal hlutaðeigandi gefinn kostur á aðlögun varðandi þessa breytingu úr tunnukerfinu yfir í pokakerfið til 31. desember 1983. 1. janúar 1984 skulu hlutaðeigandi sbr. samþykkt þessa þá þegar hafa komið sér upp aðstöðu fyrir pokakerfi, en þá verður sorphreinsun með tunnukerfi hætt og eingöngu hreinsað sorp samkvæmt pokakerfi.

Heilbrigðis- og tryggingamálaráðuneytið, 11. mars 1983.

F. h. r.
Jón Ingimarsson.

Ingimar Sigurðsson.

Nr. 311

4. maí 1983

AUGLÝSING

um staðfestingu félagsmálaráðuneytisins á samþykktum fyrir Byggingarsamvinnufélag Bandalags háskólamanna (BHM).

Skv. lögum nr. 59 30. apríl 1973, sbr. 79. gr. laga nr. 51 9. júní 1980 um Húsnæðisstofnun ríkisins, hefur ráðuneytið í dag staðfest samþykktir fyrir Byggingarsamvinnufélag Bandalags háskólamanna (BHM).

Félagsmálaráðuneytið, 4. maí 1983.

F. h. r.
Hallgrímur Dalberg.

Hólmfriður Snæbjörnsdóttir.

Nr. 312

24. maí 1983

REGLUGERÐ

um breyting á reglugerð nr. 152 8. mars 1983, um bann við togveiðum út af Vestfjörðum.

1. gr.

Í stað orðanna „10. júní 1983“ í 1. gr. reglugerðarinnar komi orðin: 26. maí 1983.

2. gr.

Reglugerð þessi er sett samkvæmt ákvæðum laga nr. 81 31. maí 1976, um veiðar í fiskveiðilandhelgi Íslands, til þess að öðlast þegar gildi og birtist til eftirbreytni öllum þeim, sem hlut eiga að máli.

Sjávarútvegsráðuneytið, 24. maí 1983.

F. h. r.
Jón B. Jónasson.

Þórður Eyþórsson.